

ԳԼՈՒԽ Թ
ՄԱՂԱՍ¹¹⁶ ԲԵՐԳԻ ԳՐԱՎՈՒՄԸ

Հունաց Մորիկ¹¹⁷ թագավորը ազգությամբ հայ էր՝ Արարատ գավառի Օշական գյուղից։ Նրան հաջողվեց թագավորել Կոստանդնուպոլսում քառասուններկու տարի։ Սա իր հայրենի երկիր Հայաստան Մաղաս անունով հայազգի մի մարդ ուղարկեց, որ իր անունով մի քաղաք կառուցի Հայաստանում։ Սա գնաց, Շիրակ գավառում Անիին մոտիկ՝ հարավային կողմը, Ախուրյան գետի ափին երկու լեռների միջև մի տափարակ տեղ գտավ, որը երեք կողմից շրջապատված էր բարձր քարափներով, իսկ արևմտյան կողմը փոքր-ինչ հարթ էր, բայց քիչ զառիվայր։ Տեղը հավանեց, այն պարսպեց և դուռ կախելով անվանեց Մաղասաբերդ։ Քանի դեռ իշխանությունը քրիստոնյաների ձեռքին էր, քրիստոնյաներ էին տիրում Մաղասաբերդը։ Երբ կրկին ընկավ պարսիկների ձեռքը, պարսիկները Մաղասաբերդը տիրեցին մինչև մեր օրերը։ Մեր ժամանակ մի մահմեդական օսմանցի ծպտվեց կարմիրագլուխների (պարսիկների) կերպարանքով, հագավ մորթի, իրեն անվանեց օրինապահ, որ նշանակում է ավդալ կամ դարվիշ։ Սա երբեմն գնում էր Կարբի, երբեմն՝ Մաղասաբերդ։ Այսպես երթևեկությամբ ծանոթացավ Մաղաս բերդի սուլթանին։ Այնպիսի հավատարմություն ցույց տվեց, որ բերդի բանալին վստահեցին նրան։ Այնպես եղավ, որ սուլթանը գնաց Երևան. սուլթանը ազգությամբ բողջալու էր։ Բերդում թողեց իր որդուն։ Բերդում էր նաև դարվիշը։ Օրերից մի օր Կարսի փաշայի մոտ ուղարկեց մի մարդ և զեկուցեց նրան, թե այսինչ գիշերը եկեք դուք այս բերդի դուռը, և ես սա կտամ ձեր ձեռքը։

Երբ օսմանցիք այս լսեցին, ուրախացան, պատրաստեցին երկու հարյուր մարդ, պայմանավորված գիշերը պատրաստվեցին և ելան արագավազ ձիերով գնացին ձորի բերանը. իջան, ձիերը կապեցին այնտեղ, իսկ իրենք ոտքով անծպտուն ընթացան մինչև բերդի դուռը։ Իսկ անիծյալ ավդալը (օրինապահը) կանգնած էր պարսպի վրա ու նայում էր։ Եվ տեսավ օսմանցիների զորքը, քանի որ ձեռքին բերդի բանալին ուներ, բացեց դուռը և նրանց ներս մտցրեց։ Բռնեցին սուլթանի որդուն և գերեցին նրա մեջ եղածներին։

Իսկ սուլթանի կինը երբ տեսավ, որ բերդը գրավեցին, իր երեսը պատեց գլխաշորով, իրեն բարձր քարից վայր նետեց և մեռավ։ Այսպես քաղաքը ընկավ օսմանցիների ձեռքը մինչև այսօր։ Երևանի խանը այս լսելով բռնեց սուլթանին, մորթր տիկ հանեց, լցրեց խոտով, ուղարկեց շահին, իսկ ինքը զորք ուղարկեց Քրդստանի կողմը, բերեց շատ ավար և գերիներ թվով հարյուր քառասուն։ Այս տեղի ունեցավ 1087 (1638) թվին։

ԳԼՈՒԽ Ժ
ԹԱԹԱՐՆԵՐԻ ԳԱԼԸ ԵՐԵՎԱՆ

Երբ Կարսի թուրքերը գրավեցին Մաղասաբերդը, իրենց արքա սուլթան Մուրադին ավետիս հղեցին։ Թագավորը հրամայեց, որ բերդը տան նույն գրավողին որդեգորդի։ Եվ այդպես էլ եղավ, (գրավողը) կոչվում է Խաթունօղլի։ Ինքը սուլթան Մուրադը առավ իր զորքը ավելի քան յոթ հարյուր հազար և գնաց Բաղդադի վրա։

Հինգ հարյուր թաթար Կաֆայից ուղարկեց Կարին Քանան փաշայի մոտ և պատվիրեց նրան՝ հավաքել մերձակա փաշաներին զորքերով և գնալ պարսից կողմերը՝ ավարելու և գերեվարելու։ Նա հավաքեց բոլորին, ինչպես որ հրաման առավ՝ Կողոնիայի¹¹⁸ փաշային, որ Շապուրասարն է, Դարունքի¹¹⁹ փաշային, որ Հասան Դալան է, Կարսի փաշային, Ախալցխայի Սաֆար փաշային, հավաքվեցին ավելի քան քառասունը և եկան Արարատի երկրի վրա, հասան մինչև Կոտայք¹²⁰ գավառը, գերեցին, ավարեցին, ինչ որ գտան։ Երևանի խանը այս լսելով հավաքեց իր զորքերը շատ քիչ և ելավ Քանաքեռի դիմացի առապարը, անկոխ տեղով գնաց իսմայելացիների զորքերի վրա։ Գնացին մինչև Կետրոն* (Քեքրան), անցան Հրազդան գետը, որ կոչվում է Ջանգու։ Նրանց ձիերը ծարավից պապակված էին, ջուր խմեցին ու ծանրացան։ Եվ գնացին Պտղնի¹²¹ կոչված ավերակ գյուղի վերևը և ընդհարվեցին միմյանց։ Իսմայելացիք կանչեցին բարձրաձայն աղաղակով և հարձակվեցին պարսիկների վրա։ Ոմանք հետապնդեցին խանին

* Բնագիրն է Գետրոն։ Հրատարակիչը անծանոթ բառ է կարծել։ Ջանգվի ափի Քեքրան գյուղի Կետրոն անունն է՝ Կոտայքի շրջանում։